

# 8 langkah strategik tambah baik pengurusan bencana

Mekanisme koordinasi bantuan NGO, sukarelawan diperkasa

Oleh Rafidah Mat Ruzki  
fidahruzki@bh.com.my

**Putrajaya:** Kerajaan menggariskan lapan langkah strategik bagi menambah baik kaedah pengurusan bencana negara.

Perdana Menteri, Datuk Seri Ismail Sabri Yaakob, berkata antara langkah berkenaan adalah pemerkasaan dasar, perundangan dan mekanisme berkaitan pengurusan bencana dan pengurangan risiko bencana (DRR).

Selain itu, penekanan diberikan terhadap inisiatif DRR; menyediakan dana untuk pengurusan bencana dan DRR; mengukuhkan mekanisme koordinasi dan kompetensi pemegang taruh pengurusan bencana dan penambahbaikan sistem dan penyampaian maklumat dalam pengurusan bencana dan DRR.

Ia juga membabitkan pemerkasaan dasar dan mekanisme



Ismail Sabri mempengerusikan Mesyuarat Jawatankuasa Pengurusan Bencana Pusat (JPBP) di Putrajaya, semalam.

(Foto ihsan Jabatan Perdana Menteri)

koordinasi bantuan pertubuhan bukan kerajaan (NGO) dan sukarelawan; meningkatkan kemahiran dalam komunikasi krisis dan komunikasi strategik serta meningkatkan kapasiti komuniti setempat dan tumpuan terhadap 'localisation' dalam pengurusan dan DRR.

Perdana Menteri berkata, langkah itu dibentangkan Agensi Pengurusan Bencana Negara

(NADMA) dan dipersetujui Mesyuarat Jawatankuasa Pengurusan Bencana Pusat (JPBP), yang berlangsung kelmarin.

"Perluasan dasar DRR pada peringkat negeri dan daerah dapat memastikan pengurusan bencana banjir dapat dipertingkatkan berikutan satu platform yang diwujudkan bagi menyimpan semua repositori daftar risiko secara sistematik," katanya dalam

satu kenyataan media, semalam.

Perdana Menteri berkata, Kementerian dan agensi juga disarankan untuk menetapkan sebanyak lima peratus daripada perbelanjaan mengurus dan pembangunan bagi tujuan pengurusan bencana pada masa akan datang.

Beliau berkata, ia penting bagi persiapan perbelanjaan persediaan bencana, pemulihan dan pas-

ca bencana serta pencegahan dan mitigasi risiko bencana.

Perdana Menteri berkata, kerajaan juga maklum bahawa perubahan iklim juga adalah antara faktor kepada bencana banjir di negara ini.

Sehubungan itu, katanya, kerajaan akan mewujudkan subjek utama dalam menangani bencana pada pelbagai peringkat pendidikan, sekolah, kolej dan universiti supaya seluruh Keluarga Malaysia dapat mengadaptasi masalah banjir sebagai norma baharu.

Ismail Sabri berkata, banjir yang berlaku di negara ini mengakibatkan kerugian bukan sahaja terhadap harta benda, malah kehilangan nyawa.

"Natijah daripada bencana banjir ini menyebabkan negara mengalami kerugian RM6.1 bilion akibat kerosakan aset awam dan infrastruktur, tempat kediaman, kenderaan, sektor pembuatan, premis perniagaan dan sektor pertanian.

"Apa yang berlaku ini seharusnya menjadi titik permulaan untuk merangka paradigma baharu bagi menghadapi bencana banjir pada masa akan datang.

"Kerajaan tidak mahu lagi melihat bencana banjir menjejaskan kesejahteraan hidup rakyat," katanya.